

## BUSETU MIA

### L'AGRICURTURI

Parrannu di Busetu Palazzolu  
Battagghia, Batia e Luzzianu  
ddi beddi terri di fertili solu  
tuttu Busetu, Tanci cu Blantanu  
di fama stu cumuni pigghia volu;  
puru cu li sò punti cchiù luntanu  
dunni l'agricurturi ha travagghiatu  
e ridi cuntentu pi lu risurtatu.

## DDOPPU AUSTU

Dopu chi passa lu misi d'austu  
l'agricurturi penza a la racina,  
si la vinnigna veni a tempu giustu  
cumentu la carria a la cantina;  
fa la nchinata di lu beddu mustu  
lu furmintenddu si lu v'ammacina  
e teni lu cannizzu beddu chinu  
e tanti vutticedda cu lu vinu.

## BUSETU DI NOTTI

Appena chi s'affaccia di purteddi  
taliati Busetu quannu scura,  
parinu stiddi tutti ddi ciammeddi  
alluminatu fa la ran fiura.  
Tuttu paratu di lamparineddi  
mi pari ch'è Milanu addirittura,  
pari nu sonnu ddi luci lucenti  
e tutti l'abbitanti bona genti.

## A TUTTI LI ASCURTATURA

Grazi dicu a tutti scurtatura  
c'aviti ntisu la mè puisia  
chist'otra chi fazzu cu primura  
scusati si mi trovu fora via.  
Ma lu pueta è donu di natura  
nasciu prima di la fantasia,  
fora di vuiatri ogni bruttura  
bona notti a tutti du 'zu Ntria.

## USU CHI FUSSI JUCARI LA MURRA

(Premiata a Palermo)

Pari chi fussi jucari la murra  
un Statu contra a n'altu n'tima verra,  
c'è luzuinu chi cci fa la n'furra  
lu turrurista l'uffinsiva sferra.  
Furti, s'questri, dilitti, camurra  
e d'attintati c'è lu serra serra.  
Tagghianu carni umana comu surra  
negghi di sangu vapura la terra.

## LA MALA VIA

Tutti li chiovi vannu a li sò toppi  
e lu stessu a li pettini li ruppi;  
tu nta la mala via ci galoppi  
st'attentu ma però dunni va' ntuppi  
quannu ti veni davanti lu stoppi  
e tannu l'amarizzi ti l'assuppi,  
S'intiti ca lu latru di carrera  
o mori ammazzatu o va ngalera.

## NESSIRI AVI...

Si manciau l'aranci, ficu e pruna,  
n'atru panaru chinu di racina,  
grossu zimmili di pira e miluna,  
du' chila di ricotta e nna zabbina,  
marena cu cirasa e limiuna,  
di ficazzani 'n'atra sacchina...  
dunni fici poi idda cacatuna  
v`a nfunnu un gaddu e puru nna gaddina.

## NTAVULA LU VINU BONU

Stu vinu fattu beddu pi la menza,  
sintiti chi profumu nta la stanza,  
è chiaru chi nun c'è nna risirezza  
bonu di lu culuri e la sustanza.  
Ma siddu nun ci emu cu dicenza  
nta la testa nni fà la cuntraranza,  
s'è bberu comu dici la mé senza  
sicuru lu sintemu nta la panza.



## VITA

Aiu ottant'anni, assai bbastanti  
e, menu mali, senza surfirenti,  
chi vita dura pi ghiri nn'avanti  
di cchiù li guai chi li gurimenti;  
però ci sù ghiurnati tra li tanti  
cu gioia, cu lirizza risulenti.  
Dicemu comu chista cunzulanti  
figghi e niputi tutti cca prisenti.

## A LU NUTARU DI VITA PI LU TISTAMENTU

Scritta precisa la data cu puddu,  
ogni partita lu sò tinnireddu;  
capiscinu dunn'è lu sò pizzuddu  
comu fussi tagghiату cu cuteddu;  
e comu potti fari mi smiruddu  
puru cunchiusu nta un circu d'aneddu.  
Nutara d'accussì nun ci sù nuddu  
che ginirusu, diligenti e beddu.

## A TUTTI DI SCENZIATI

Ma senza chi barbaria chi faciti  
li nazioni nguerra preparati,  
di li armi atomichi furniti  
pi quantu semu tutti massacrati.  
Aggiustari lu munnu nun sapiti  
però a stirminallu vi firati  
cu tanti scenziati chi ci siti  
pi struriri lu munnu sturiati.

## LU PRIMU AMURI NUN SI SCORDA MAI

Lu primu amuri nun si scorda mai  
unn'è corpu di spugna, pigghia e stui,  
nun cancella l'affettu, tempu e guai  
si l'amuri è forti di li dui.

Perciò dati parola ferma assai  
chi di lu cori l'affettu nun fui.

Si sti palori stimati sinceri  
vulitivi beni mariti e muggheri.

## LU SPLINNURI DI NNA SIGNURINA

M'appicò ntra ll'occhi nna faidda  
appena c'affacciavi da vanedda,  
comu rifressu di nna granni stidda  
russa cirasa sta vuccuzza bedda.

Certu ca nun ci nn'è cchiù bedda d'idda  
chi mmezzu di li bbeddi la cchiù bbedda  
si pò chiamari pi lu sò splinnuri  
stidda pulari di l'Orsa Minuri.

## LU PICCIOTTO NNAMURATU

Unn'aiu cchiù né paci né risettu  
di lu mumentu quannu vitti a ttia,  
mi nn'ammuravi di sinceru affettu  
scutiù tutta la pirsuna mia.  
Mentri mirava ssu visu pifettu  
la stidda di l'Orsa mi paria,  
e ora la nutizia l'aspettu  
chi fussi pusitiva e prestu sia.

## A LI SPOSINI

Auguri a sta coppia di spusini  
squillanu gioia puru li campani,  
vi fannu complimenti li vicini  
e tutti li parenti cchiù luntani;  
fannu lu stessu l'ancili divini  
di li cilesti mperii suprani.  
Ed ora chi ssu beddi e cunsacrati  
gioia e cuntintizza pi li strati.

**POESIA AUGURALE**  
**A GIUSEPPINA E FRANCESCO MAIORANA**

A sta coppia auguri infiniti  
oggi e pi sempri ralligrati stati,  
v'auguru a stu munnu chi guriti  
pi tutti cosi chi disiderati:  
gioia, longa vita e sempri uniti  
e puru dicu nell'eternitati  
un sulu cori di li dui faciti  
comu du' palummeddi accoppiati.  
Dutturi tu Francescu Maiurana  
e dutturi Lubbuì Giuseppina  
siti vinuti di città luntana  
davanti a Diu e la matri divina  
com'è la giusta firi cristiana  
chi nni la nzigna la nostra duttrina.  
Vi binidiciu la Matri Suprana  
ora siti lu spusu e la spusina.  
Nun ci è statu smettiri e canciari  
chistu si pò ddiri veru amuri  
nta chista sala nun putia mancare  
di li parenti rentiri l'onuri.  
Ati saputu per beni onorari  
a tutti li parenti e genituri.  
Semu dunni si vulia arrivari  
chiddu chi voli Diu cchiù nun si struri.



## A CUNCETTA MAIORANA

Parlu di Cuncetta Maiorana  
cchiù bedda di lu suli e di la luna,  
l'aspettu si pò diri di baggiana  
precisa, rigulata di pirsuna;  
è nn'abitanti di Bruca Suprana  
cu si la spusa accanza nna fortuna  
e tò parenti puru Maiurana  
ti vosi fari sta fotu-canzuna.

## A FRANCA MARGAGLIOTTI

Distinta di pirsuna, bedda tutta,  
sì Franca veramenti riginetta  
e poi lu granni affettu chi m'ammutta  
vulissi la cunferma si mi spetta.  
Pi Franca tantu geniu mi nzurta  
picchè avi virtù e puru è sperta  
e siddu chista cosa m'arrisurta  
tannu la mè menti s'arrisetta.

## A MARIA, MIA SORELLA

Ntò Miciganni vinni di vulanti  
quasi du' misi stesi risirenti,  
e cu Pitrinu, Marghirita e Danti  
passavi tanti iorna divirtenti.  
Ti fu la mè vinuta ncuraggianti  
partisti senza di l'avvirtimenti  
liggivi la tò scritta parpitanti  
chi già ti trovavi a n'autru cuntinenti.

## A VITO SCUDERI FU ALBERTO

L'atra vutazza, Narduzzu Scuderi,  
vinni di notti chi t'avia a parrari  
siccomu dintra tu nun ci riseri  
di notti isti li favi a zappari.  
Stu fattu lu dissi a mè mughheri  
mi dissi: lu facisti spavintari  
sintennu scrusciu nun sappi cu eri  
nna pitratuna vulia tirari.

Nardu nun sapennu a chi pinzari,  
stu scrusciu già durava di cuntinu:  
sintia comu fussi rusicari;  
pò essiri lupu, vurpi o porcu spinu  
nzamai ti putia ammazzari.  
Viri a li voti lu malu distinu,  
di notti nun ci'agghiri a tracagghiari,  
lassa chi si perdi favi e linu.

## A ME NIPUTI D'AMERICA

Vituzzu ricivivi lu tò ritrattu,  
gradisciu lu tò signu di rispettu  
ti pozzu diri chi ssi omu fatto  
di pocu tempu ch'eri ragazzetto.  
A Bruca cu mmia fusti di scattu  
e ti nciammasti di lu mè ntillettu,  
ricordi la sunata c'aiu fattu  
voi chi ti mannu un friscalettu.

Certu chi ti nni mannu puru dui  
chi tu ti passi lu piaciri c'ai,  
poi li sunatura semu nui  
si ti mpari bbonu e ci la sai.  
Ma cu ti pò mparari, dimmi cui  
iu nznignari a ttia un 'zarrà mai,  
si fussimu vicinu tutti e dui  
certu ma li distanzi sunnu guai.

Di mezzu lu gran mari chi nni sparti  
la pussibilità chi nun l'ammetti,  
puru chi fussi, nun ti mpari arti  
sunari di st'antichi friscaletti.  
Tu li strumenti boni ti l'accatti,  
chi sù li fisarmonichi pifetti,  
ci sunnu puru li strumenti esatti  
clarini, violini e li curnetti.

Tu cui li friscaletti ti diletta  
e di tò nannu lu signu nni porti  
chi sunaturi fu di chiddi scerti  
tò nannu Maiurana nta ddi morti.  
Tu puru mparaticci chi l'anzerti  
però strumenti d'autri sorti  
e nzumma quannu soni sti friscetti  
fammi sapiri comu ti diporti.

Stu cunzigghiu mi l'avia scurdatu,  
mi era di la memoria smarritu  
ora nni sarai raccumannatu  
tu bbirienti nni resti cuntritu.  
Quannu chi tò patri è siddiatu  
à sunari cchiù picca, caru Vitu,  
certu si cci parti a camurria  
manna corpu di sangu puru a mmia.

## CULLECHI PUETI

Mi trovu cu pueti di valuri  
Curcasi famusu e Sucameli,  
Filippu Maiurana prufissuri  
Settimu Scuderi abati Meli  
e tanti atri chi fannu bravuri.  
Giaramita nni guida senza veli  
la musa mia nunn'è la riggina,  
calati iuncu chi passa la china.

Lu nostru Giaramita prisirenti  
è pirsunaggiu di senza brillanti  
e sutta la sò guida sulamenti  
la nostra sucità pò ghiri avanti.  
Cari cullechi precu, sull'attenti,  
ascurtatura, vicini e distanti,  
facemuci li nostri cumprimenti  
appausi longhi e baci tanti.

In occasione della chiusura della trasmissione televisiva « L'angolo dell'Arte » presso Tele Scirocco

## TI CHIANSI LU ME' CORI

Ti chianci lu mè cori Giaramita  
nun sacciu di sta cosa surda e muta,  
m'avia parsu vinta la partita  
nun ci cridia essiri pirduta.  
Ntrionfu la passava la mè vita,  
nun mi mpurtava iuta e vinuta,  
ora sta samprea cu la cummita  
arradiu Sciroccu, cu t'ascuta?

Beddu lu versu puru la battuta  
forsi di cchiù l'ottava curunata,  
la recita vulianu ripetuta  
piccatu bedda mprisa abbannunata!  
Nic torna e facemu la riuta  
di nostra puisia disiata  
chi era di lu populu vuluta  
passavamu cuntenti la sirata.



## LU DENTISTA DI ME' SORU MARIA

Cu stu dintista tò di l'Argintina  
ti cuminasti bona veramenti,  
p'arrusicari puru la farina  
ti porta puru tanti mpirimenti.  
Finu a la gula la vucca l'à china,  
cunsidiru viremma li trummenti  
ma comu dici tu, la cchiù ruvina,  
chi quannu parri un si capisci nenti.

Senti Maria, attentami tantiddu,  
ti misi li renti un mastriceddu;  
dimmillu forsi fu mastro Sariddu  
chi fici stu travagghiu veru beddu?  
Li buchi facia cu lu puntiddu,  
li anchi ti ncasava cu marteddu  
e avennu li renti misi d'iddu  
smetti di campari un puvireddu.

Beddu dintista di mètlici stima,  
cosa di mazziallu cu nna rama,  
li anghi t'ammuliava cu nna lima  
e poi l'allargava cu nna trama.  
Li misi torti, storti, nenti rima,  
rapennuti la vucca cu nna lama  
ti rovinau, sì peggju di prima,  
megghiu la morti si lu mann'acchiama.

Giustu lu disastru comu avvinni,  
certu ci spetta sàrciri li danni,  
si tratta d'appizzarici li pinni  
moriri pi fitti e pi malanni.  
Li angunazza chi parinu ntinni,  
li renti lu cchiù curtu deci canni  
ti fannu puru cu acchiana e cu scinni  
si miritassi pigghiari trent'anni.

## LI CAPPEDDI A CRIRENZA

Cu nZinu n'accattamu lu cappeddu  
cumentu nni fu' iu, cumentu iddu,  
ducentu liri parsi mircateddu  
assiddiemunillu migghiuliddu.  
Doppu riferiu chi fu nn'aceddu  
dicennu chi lu prezzu nunn'è chiddu.  
Cu nn'aperta di manu, figghiu beddu,  
e s'iddu chi nn'abbastanu sap'iddu.

NZinu sta cosa ci parsi disprezzu,  
curri ci v' di cursa comu un pazzu,  
cappeddu nunn'accattu di ssu prezzu  
tutta sta spisata nun la fazzu.  
Ci dissi Castigghiuni nun ti scherzu  
m'addari quattru chila di tumazzu  
e siddu mi nni runi n'atru pezzu  
cririmi, sunnu sprazzi chi ti fazzu.

E ntantu nZinu nun ci pò cunortu,  
di st'antamentu nni resta scunfittu  
st'avota lu cappeddu ci lu portu.  
Puru dopu deci anni c'iaiu dittu  
ci dici Castigghiuni chi avi tortu,  
— allura nZinu, pagami l'affittu  
ca lu problema è prestu risortu  
mittennu lu cappeddu nt'un cummittu.

Ma ancora nZinu nni resta allarmanti  
ci porta sempri l'odiu putenti.  
Ci dici Castigghiuni: — Stravacanti,  
pigghiati lu cappeddu, un ti nni penti!  
Lu beddu ci faccia di davanti  
e di darrè lu boia veramenti;  
nzumma, tra cumpraturi e cummircianti  
nun si cunchiuriu propriu nenti,

e lu cappeddu, comu v'aiu dittu,  
avi di tannu c'ancora nun mittu.

## LI BIDDIZZI DI PIPPINA LUMBARDU

Quant'è bidduzza Lumbardu Pippina  
bedda cu l'aspettu e cu statura,  
l'occhi du' stiddi di la mattutina  
e la facciuzza culurita e pura.  
Di carnaciumi pulita e fina  
dicu chi fà ncantari addirittura,  
è di li signurini la riggina  
certu cu nni fà cchiù matri natura.

Lu dui di Marzu è lu cumpliannu  
di dda figghia d'amuri di Pippina,  
li parenti l'auguri ci fannu  
mittennu la tuvagghia sup raffina.  
Amici vicini tutti ca ci vannu  
di tanti genti la sò casa è china  
o dui marzu fà diciannov'anni  
e di la sò biddizza prestu spanni.

## LI BIDDIZZI DI ROSA

Tutta bedda cu pisu e cu misura  
l'occhi dui stiddi jettanu energia,  
è culibrata di giusta statura  
a ognunu fà pi bberu simpatia.  
La facci tunna culurita e pura  
la fai nnamurari a cu talia,  
nunn'è capaci cchiù matri natura  
di fari la paraggia comu a ttia.

## A LI SIGNORINI DI BRUCA

Guardati sti gentili signurini  
chi fannu veru lu cori nciammari,  
beddi, gentili, ginirusi e fini,  
veru biatu cu li pò spusari.  
Pi mmia sunnu chiusi sti camini,  
mi dannu c'un mi pozzu cunurtari,  
nun vogghiu nenti, ancili divini  
un vasuneddu sulu m'ati a ddari.

## AL DEFUNTO POETA PEPPINO DENARO

Ora vi parru d'un pueta veru,  
mi riferisciu a Giuseppe Denaro,  
iuntu mParnasu lu ricanuseru  
veru famusu, gran pueta raru.  
A Parnasu fà lu gioellieru  
di diamanti di massimu graru,  
i sò cullegghi chi si l'accuggheru  
unicu mParnasu l'appruvaru.

Caru Dinaru, si tu vivu fori  
t'abbrazzassi cu forti vasatedda,  
ma ora dda, nta ddi beati cori,  
sulu la musa ti fa carizzedda.  
T'anuranu li musichi sonori  
pi la tò puisia veru bedda  
sunnu miludiusi li palori  
comu di pani anticu nna gran fedda.

Senza ricintu la tò fantasia,  
a tutti li pueti fa' la sfita;  
e di ddu jornu c'un nnavemu a ttia  
nni regna nta lu cori nna firita.  
Morti facisti tanta tirannia,  
ti lu tirasti cu la calamita  
nostru maestru di la puisia  
ora nn'eternu dormi all'atra vita.

Disposti li parenti a la sò guita  
quannu la morti barbara scinniu,  
ci davanu quintali di munita  
pi riturnari arrè dunnì partiu;  
ma idda tanta crudil'accanita  
chi lu livà davanti e sinni iu,  
lassannu a li sò cari nna firita  
e lu cori nta nna vampa ci ardiu.

Muriu st'omu bonu e rispittusu,  
la pena mpettu nun pò cchiù passari;  
ddu circulu è ancora bisitusu  
Peppi Dinaru nun si pò scurdari.  
Puru lu mè cori addulurusu  
teni lu latu di li famigghiari  
tantu chi lu sò circulu famusu  
mi vosi cu nn'affettu tissirari.

## L'ARBA DI LA VITA

Tri miliardi d'anni su passati  
fu lu spuntari l'arba di la vita,  
è cunfirmata di li scenziati  
cu chiddi chi truvàru la partita.  
Dintra nna roccia eranu ngrastati  
nna vera alga sferica nnurita  
cunn'altu Batteriu trovati,  
fatta la fotu e poi ngrannita.

Lu fossili nta ll'Africa truvatu  
fu a lu micrusopicu ngranditu,  
l'ità di lu batteriu datatu  
radiuattività ha stabbilitu.  
E foru l'anni di lu risurtatu,  
tri miliardi ch'era sippillitu.  
Di stu batteriu c'aju parratu  
di cillulari nucliu sfurnitu.

E li strati quarzusi titulati  
era n'avota funnu di lu mari,  
poi foru muntagni scuppunati  
pi sti formi di vita ntrappulari  
e di quant'avi sù petrificati  
e nta li rocchi si vannu a truvàri.  
Sidimentari rocchi sù chiamati  
di giologi chi vannu a ricircari.

Lu microrganismu suddafricanu  
avi li formi di lu bastuncinu,  
furma di vita anticu e luntanu  
partiu pi misteru lu distinu.  
La vita accuminciò a manu a manu,  
luttannu lu durissimu camminu  
e finamenti l'omu cristianu  
a lu scurari nunn'è cchiù matinu.



## LU PUSTINU

Fu Vanni Adragna di Tanci Suttanu  
chi prummissi pummaroru e vinu  
però mi lu mannò stu cristianu  
cu Ninu Riggireddu lu pustinu.  
— Porta st'oggetti a Tangi Supranu,  
dalli a Maiurana tò vicinu —  
ma nun pinzava di stu casu stranu  
chi ghia a finiri a viulinu.

Di Riggireddu pigghiu stu latinu  
c'à Palizzolu mi vinni a nzurtari,  
mi veni pi darrè com'un rapinu  
vinennumi nta facci a granfiari.  
Di scattu mi votu e vitti a Ninu  
pigghia e mi dici l'arringraziari:  
li pumaroru di lu cannistrinu  
fiteru tantu chi l'appi a ghittari.

Siddu chi parti nni sapissi fari,  
veru ci li facissi zzu Nniria.  
Ci dissi: viri si pò studiari  
di rrestu la raggiuni sta pi ttia;  
li pumaroru l'avisti a ghittari  
lu vinu puru fetu ti facia  
dici chi parti nunni sai fari  
ma ssa partaccia la facisti a mmia.

Comu un ti fici nudda diarria  
quannu chi lu mè vinu ti vivisti,  
a culuapponti stari nta nna via  
e tanti genti essiri a la vista.  
Lu vinu fu picchi ti piacia  
puru li pumaroru ti futtisti  
ed ora m'allampi nna bugia;  
ti dicu l'acqua dintra ti mittisti.

A palazzolu tu mi lu dicisti  
chi tantu tempu ti facia aspittari  
si veniri tardavi nun cunzisti  
lu vinu lu putivi cunzirvari.  
Nzuspettu pi sta cosa mi mittisti,  
caru Ninuzzu nun m'abbabiari  
ma puru la buttigghia ti tinisti  
ma veru tutti cosi ci'appizzari.

Caru Riggireddu m'à scusari  
siddu ti parru cu mali maneri  
lu vinu chi cchiù nun putia stari  
dintra t'addumannava lu luveri.  
A mmia cu li parti mminazzari  
ti sdirrupasti cu li stessi peri.  
Quannu li pupi si vannu a tuccari  
di vastari l'opera succeri.

Cummeni chi chiuremu la partita  
mittennu frenu firmamu la rota,  
ma fussi di dillu a la currita  
e di finilla doppu l'arricota.  
Vanni Adragna ti cumanna e mmita  
si nun mi porti li cosi st'avota  
sapennu ch'è sicura la partita  
si ncaparratu pi n'atra vota.

## DIU-NATURA

Quantu cosi nn' à fattu la natura  
chi dintra l'universu sunnu nchiusi,  
nterra vurcani chi fannu paura  
ma puru cosi beddi e maistusi.  
Vinni la vita cu nna lotta dura,  
foru li primi chiddi cchiù cunfusi;  
quannu tutti li cosi foru sorti  
Diu, natura cunnannasti a morti.

## L'OMU NGANNUSU E LU CANAZZU MUTU

Lu canazzu mutu a ll'ammucciuni  
ti veni pi darrè misu calatu,  
t'assarta cu du' forti scarricuni  
a trarimentu ti viri strazzatu.  
Tu certamenti quannu ti nn'adduni,  
a lu mumentu chi s'è muzzicatu,  
lu stessu lu ngannusu si fa beddu  
e poi a li spaddi chianta lu cuteddu.

## NUN C'E' NE' FIRI E MANCU CUSCENZA

Nun c'è firi e mancu c'è cuscenza  
l'umanitati di sangu macchiata,  
quantu armi murtali fa la scenza  
chi freni nun c'è cchiù pi la firmata.  
Disia supranità ogni putenza  
pi la verra stillata preparata  
d'un mumentu all'altu nun si penza  
lu munnu chi pò fari nna vampata.

## L'ACCUSATU SI DIFENNI

Pigghia lu tò cumpassu cu lu squatru,  
signa giustu nta lu sillabbariu,  
di cuscenti l'affari lu tò quatru  
s'iddu siti beddu o puru lariu;  
poi, prima d'accusari a n'autru,  
varda lu tò latu s'è cripariu:  
prima chi mi dici tu sì latru  
v'attalia lu tò casillariu.

## LA MALA LINGUA DI LA IMMURUTA

La mala lingua chi fà sempri danni  
di fari ruvini nun si cunfunni,  
nun li viri lordi li sò panni  
lu veru malu nesci di li tunni  
e ddici cu ddu immu tantu ranni  
siti immuruti e macabbunni;  
mentri lu saccu di ch'è chinu spanni  
la ronna dunnì pecca ti rispunni.

## LU ADDU CU LA CIOCCA

Lu gaddu cu la ciocca si sciarria  
picchè la ciocca sta sempri unciata,  
lu addu supra ullatu ciffirria  
e cu ll'ala ci duna l'ammuttata.  
La ciocca arrizzata s'arrabbìa  
ci duna nta la facci nna zampata;  
lu nnumani arrè l'abbuturia  
ed idda ci fà l'autra passata.

Lu gaddu chi nun sapi addiari  
di la ciocca ci tocca abbuscari.

## LU VERU AMICU

Scutati tuttu chiddu chi vi dicu,  
pirsuni tinti nun nni praticati  
è sempri megghiu nun ci aviri ntricu  
è mali pi ccu l'avi avvicinati.  
Vàrdati di l'amicu s'è nimicu,  
ca pò trattari cu la farsitati,  
tannu si prova lu cori d'amicu:  
bisogni, malatii e nicissitati.



## LA SIGNURINA FATTA DI CUNCHIGGHI

La signurina fatta di cunchigghi  
ma stu maistru comu potti fari?  
Grossi, minuti e medii puntigghi  
pusati ognuna dunni c'avastari.

Beddu lu pittuzzu, occhi e gigghi  
cchiù taliannu cchiù nni fa ncantari,  
ci dicu assemi a tutti li mè figghi:  
bidduzza picchè nun voi parrari?

Parra e dici « mamma » a vuciari,  
dicillu ora me matruzza Rosa  
accussì ti veni idda a carizzari;

ti dici stai cuntenta e arriposa,  
t'abbrazza forti e ti vasa macari  
tu si nta tò stanza e dda ti posa.